

Date – 31/08/2024

Time - 18:30 -18:40Hrs

REGIONAL NEWS BULLETIN

HEADLINES (EVENING)

1. Mizoram PWD hotute leh Central YMA hrugaituten Mizoram chhunga inkalpawhna kawng dinhmun bakah Aizawl khawpui chhung kawngpui chhe lutuk chungchang te an sawiho.
2. Tunlai ruahsur nasa avanga chhiatna thleng chuan Aizawl District khawsak phung a ti khaihlak mek a, vengchhung leh kawngpui dunga leimin hrang hrang thenfai hna thawh mek a ni.
3. Prime Minister Narendra Modia chuan vawiin khan National Conference of District Judiciary New Delhi-a Bharat Mandapam-ah a hawng.
4. Russian helicopter mi 22 phur chu vawiin khan chin hriatlohin a bo..

<><><>

PWD & CYMA

Mizoram PWD hotute leh Central YMA hruaitute chu nimin tlai khan an inkhawm a, CYMA leh PWD in thawhhona thuthlung an ziah tawh chungchang te an sawi ho a ni.

PWD Engineer in Chief Conference Hall-a hun hmanah hian Mizoram chhunga inkalpawhna kawng dinhmun bakah Aizawl khawpui chhung kawngpui chhe lutuk te sawi tel a ni bawk.

Inkawmhona hi PWD Engineer-in-Chief, Pu Lalrinkima Hnamte in a kaihruai a, PWD - a Chief Engineer (CE) ho te an tel a, Central YMA atangin President Pu Lalhmachhuana leh OB dangte an tel bawk ni.

He hunah hian Mizoram hmun hrang hranga PWD enkawl kawngpui laih mek chungchang sawi ho a ni a, chung zingah chuan Champhai leh Zokhawthar inkar kawng laih mek te, Mamit leh Bairabi inkar, Saikhawthlir atanga Zamuang inkar, te bakah Aizawl khawpui chhung kawng chhe lutuk chungchangte sawi lan a ni a. Central YMA hruaitute chuan kawng lai tu hnathawk chak lo ten chak zawka hna an thawh theihna tura puih ngaihnaah PWD te puih an inhuam thu an sawi a. Nakuma YMA Inkawmpui Lian thlenna tur Sakawrdai panna kawng siamthat chungchang te leh Mizoram hmun hrang hranga PMGSY kawng laih mek chungchang te sawi ho a ni bawk.

PWD hotute chuan Aizawl khawpui chhung kawng chhia leh khuar nasa lutuk chu ruah tui a tlak reng avanga thawh theih a nih loh thu leh khaw that veleh a thawk thei tura an inpeih thu an sawi a. CYMA hruaitute chuan Kawng sira tuiluankawr khuh phui a nih avanga Kawngpua tuihawk luang nasa in kawng a tih chhiat theih thu an sawi a. A khuhna hi hawn a tuihawk luan luh theia siam an duh thu te an sawi bawk.

Central YMA leh PWD te hian kum 2018 June thla atang khan Mizorammin Kawngpui tha a neih theihna tura thawhhona thuthlung (MoU) an ziak a, tuna MOU an ziah mek hi nakum July ah a tawp ang.

<><><>

AGRI WHOLESALE MARKET

Agriculture Minister Pu PC Vanlalruata leh Enviroment, Forest & Climate Change Minister Pu Lalthansanga te chuan Sihphir Venghlun, Phunchawng, Falkawn leh Mel 3-ah te 'Agriculture Produce Wholesale Market', sak theihna hmun tur vawiin khan an enfiah a.

Pu Lalthansanga chuan Aizawl dai vel mai ni lo, Zokhaw lamah kuthnathawk eizawng tamtak an awm tih sawiin, thlai thar hralh chungchangah te harsatna an tawk nasa thin hle a, a ti a. Mizoram chhunga thlai tharte pawh wholesale market neih anih chuan a hralhna kawngah hmasawnna a awm phah ngei a beisei tih a sawi.

Agriculture Minister Pu PC Vanlalruata pawhin Wholesale Market chu sak theih a nih chuan thlai thar vawn thatna tur Cold Storage leh kuthnathawktute hah chawlhna (Rest room) te bakah Market Building chhungah ATM booth te dah tum a nih thu a sawi a,heng hian kuthnathawktute tan malsawmna thar a thlen ngei theih ngei a beisei tih a sawi bawk a ni.

Agriculture Produce Wholesale Market hi RKVY Scheme atanga sak tur niin Mizoram chhunga thlai thar te Aizawl kawtchhuah hmun li (4) ah sak tur a ni dawn a, Aizawl North leh South ah te hmatakna hmasaah an hmang dawn a ni.

<><><>

DISASTER

Tunlai ruahsur NASA avanga chhiatna thleng chuan Aizawl District khawsak phung a ti khaihlak mek a, vengchhung leh kawngpui dunga leimin hrang hrang thenfai hnatiang vawiin hian koh a ni.

Hunthar Govt. M/S bul chu nasa takin a chet belh avangin, he kawng hi lirthei zawk atan a him tawh lo a, chhiatna NASA zawk thleng thei laka mipui leh lirthei khali tute an him tlan nan Hunthar Govt. M/S bul kawng chu khar a ni rih a,

District Disaster Management Authority (DDMA) Aizawl Chairman Pu C. Lalhriatpuia, Deputy Commissioner, chuan vawiin khan Vaivakawn Zohnuaia chenna in pakhat, Pu Sangthanmawia bulidingchu a rang thei ang bera thiah turin thupek a chhuah a. Hei hi a bulhnaia chengte, ke a kal mipui leh lirtheia veivakte himna tura ruahman a ni.

Kum 2022 atang khan Vaivakawn Zohnuaui lei tlahniam hi lo lang tanin, ADDMA, S.P (Aizawl), S.P (Traffic), Aizawl, PWD, PHED, P&E, SIPMIU, G&M leh a kaihhnawih NGO te'n tum engemawzah endikna joint inspection an lo nei tawh a ni.

Lei tlahniamin harsatna a thlente tiziaawm tur leh Vaivakawn Zohnuaui Road leh NH-06 te changtlung zawka cheibawl chungchang ngaihtuah a ni thin a, Zirchianna atanga a landanin building hi a inherh mai bakah a âwn a; hemi avang hian a bang, chhuat leh retaining wall hmun tam takah a khi a, chenna atan a him loh phah ta a ni.

Heng bakah hian PWD, Quality Control, Research & Development Division chuan building him leh him loh zirchianna an nei bawk a. Sr. EE, PWD, Quality Control, Research & Development Division-in zirchianna a report dan chuan concrete chak zawng hi M10 to M19 inkar niin, bang atana leirawhchan hman, beam leh column-ahte khi tam tak a awm a, heng bakah hian kawng chung lama ground floor level chu road level atanga tehin feet 2 in a tla hniam a ni.

Building hi Vaivakawn Zohnuaui road lamah 88.88 degree velin a âwn a. Hemi a nih avang hian DDMA Aizawl chuan Pu Sangthanmawia, building, Vaivakawn, Aizawl chu ruah tla zel avanga lei tlahniamin a dinhmun ti chhiaa mihring nunna leh a vela in leh lo ah harsatna NASA zawk a thlen theih avangin thiah tul a ti ta a ni.

<><><>

EK PED MAA KA NAAM

Doordarshan Kendra (DDK) Aizawl Director (News) Pu Nampibou Marinmai chuan nimin khan Sawrkar laipui hmalakna Ek Ped Maa Ke Naam pualin Indian Institute of Mass Communication Campus MZU-ah Thing tiak a phun.

DDK News Director hian Mission LiFE (Lifestyle for Environment) programme hnuiaia hmalâkna pakhat atân ‘Ek Ped Maa Ke Naam - Plant 4 Mother’ campaign pualin Thing tiak hi a phun a, Mizoram State Tree – Herhse tiak a phun a ni.

He hunah hian IIMC Aizawl-a thawktu leh zirlai naupang ten an tawiawm a, Director chuan Ek Ped Maa Ke Naam chu sawrkar laipui program pawimawh tak a ni tih sawiin ramchhung hmun hrang hranga thing tiak phun chuan zirlaite leh mipuite ah ramngaw venhim leh ram chereu zel tur ven kawngah rilru thar put tir se a duh tih a sawi.

Director chuan thing tiak phun zawha IIMC zirlaite nen an inkawmnaah an hmasawnna tur kawng hrang hrang hrilh in huai taka awma mahni hmaa harsatna awm chu peh hel mai loa hmachhawn ngam turin a chah a, Mizote chu midang tana inpe leh nelawm tak an nih avangin midang pawh tama, zirna in pawn lama an tana tangkai tur ngaihtuah thiam turin a chah a ni.

Plant 4 Mother hnuiah hian thing phun rûnpui hi State hrang hrangah kalpui mîk niin state hmalakna in hmun hrang hrangah thing hi phun tawh a ni a, ruahman dan chuan Doordarshan, All India Radio leh PIB ah te he hmalakna pual hian thing tiak phun chhunzawm a ni ang.

Ek Ped Maa Ke Naam – Plant 4 Mother’ campaign hi Prime Minister Pu Narendra Modi-a’n kumin June ni 5, World Environment Day khân a hawng a, he campaign-ah hian India ram mipui zawng zawngte chu mahni nute puala thing tiak pakhat theuh tal phun turin a sâwm a ni.

Mission LiFE programme hi ‘Environment’ humhalh leh humhim pawimawhzia inzirtirna leh chumi kawnga mi tinin ke kan pên theih dâñ tur inkawh hmuhna a ni a, mimal leh khawtlâng anga kan nitin nunphung leh nun dânte, kan chhehvêl leilung nena inhne rem tura inthlâk danglam tura inzirtirna leh inkaihhruaina a ni.

<><><>

SABB

Sorkar laipua Ministry of Housing and Urban Affairs-in Swachh Bharat Mission-Urban 2.0 kaltlanga a kalpui 'Safai Apnao, Bimaari Bhagao' (SABB) chu Mizoram hmun hrang hrangah thla 2 chhung kalpui a ni a,

Tukin khan Aizawl Zotlang veng chuan khawtlang tifaiin hnatlang an ko a, hnatlangah hian vengchhung mi thahnemtak an thawk chhuak a ni.

SABB hi 'Stop Diarrhoea Campaign' nena kaihkawp niin fur laia faina leh natna hrang hrang dona kawnga hmalakna te, mipuite hriselna leh faina kawng zirtirte leh department hrang hrang thawhhoa helam kawnga hmalakte chu an campaign hnuiah hian a tel a, ramchhung hmun hrang hrangah hemi pual hian hun hman a ni tawh a ni.

<><><>

CHAMPHAI SOUTH MLA

Special Assistance to States for Capital Investment (SASCI) sum cheng vaibelchhe 13 leh Nuai 11 sengin Melbuk leh Zokhawthar inkar Vawmkawlui Box Culvert lei chim leh lei che avanga kawngpui kaltlang theih loha awm chu siamthat mek a ni a,

Champhai South Bialtu MLA Lt. Col. Clement Lalhmingthanga chuan helai hmun hi tukin khan tlawhin thawktute chu a tha thei ang bera hna thawk tur leh lirthei ten an zawh thuai theih nan theihtawp chhuah turin a chah a. Tun dinhmun ah hian hnathawh kal mek hi za a sawmriat (80%) thawh zawh tawh niin hnathawktute chuan an sawi.

Hemi hnu hian Champhai South bialtu MLA chuan Zokhawthar leh Myanmar inrina Tiau lui kam vel chu tlawh in Customs duty te a kawm zui a. Mipui ten bungrua zawng zawng lakluh khap anih hnu a an harsat na tawh te hria in, Sawrkar in a khap bak, nitin mimal eizawnna leh chakkhai zualpui lakluh te, a hmuna bungraw phura la lut tu inhlawh fa te chu hriat thiamna nena lo en turin Customs duty te chu a ngen a, Mizoram Sawrkari Indo-Myanmar Border Trade a ngaihpawimawh thu leh tichangtlun nana hma a lak zel thu sawiin, Zokhawthara Border Trade kaltlanga insundawn tawnna hmun khar mek a awm chungchangah helai hmun behchhana nitin a eizawngtu ten harsatna an tawh loh nan ngaihtuahna sen a țul a ni, a ti bawk.

Puan tawh angin Myanmar atanga Mizoram in chakkhai leh nitin mamawh a lakluhna kawngpui pawimawh ber, Tahan atanga Teddim kaltlanga Zokhawthar panna a Run lei chu kumin June ni 8 khan bomb chhiat a ni a, vawiin thlengin siamthat a la ni lova, sumdawnna bungrua leh nitin mamawhte chu kawng hla zawk, Falam paltlangtu kawngpui lamah kalpui a ngaih avangin Zokhawthar leh Khawmawiah bungraw lut a tlemin a lut chhunte pawh a man to ta a ni. Bungraw hlankai leh lakthlak hnathawktu, chhungkaw 700 vel ten thawh tur an neih mumal loh avangin mi tam takin harsatna an tawk a, thingpui dawr leh dawr tenau neitute bakah mipui mimir nunphung pawh sumdawnna bungraw kal tlem hian nasa takin a nghawng mek a ni.

<><><>

PM

Prime Minister Narendra Modia chuan vawiin khan National Conference of District Judiciary New Delhi-a Bharat Mandapam-ah a hawng. Thusawiin PM Modia chuan vantlang nunah hmeichhiate chunga hleilenna leh naupangte himna derthawng mek chu ngaihven a ngai hle a ti a. Ramchhunga hmeichhiate himna turin dan khawng tak tak zam a ni chungin tun aia uara hman a ngai a ni a ti.

Pu Modia chuan Supreme Court -in kum 75-na hmel a hmu thei chuan India hi mipui rorelna democracy hringtu ram anih zia a tilang a ni a ti. Supreme Court kum 75-na chu ram danpui Constitution zinkawng leh a hlutna tarlangtu a ni a ti bawk.

Vawiina COnference hawnnaah hian Chief Justice of India Justice DY Chandrachud leh Union Law Minister Arjun Ram Meghwal te pawh an tel a. Ni hniih awh tur niin Supreme Court buatsaih a ni.

<><><>

RUSSIAN HELICOPTER MISSING

Russian helicopter mi 22 phur chu vawiin khan chin hriatlohin a bo.. Thudawn danin Mi-8T helicopter hi Kamchatka region-a Vachkazhets tlangkang hmunah a ni a. He thlawhna hi Vityaz-Aero airline te enkawl niin a thlawhchhuah hnu reiloteah biak pawh theihlohin a awm zui a. Federal Air Transport Agency sawidanin thlawhna thlawhchhuah hnu lawka dan pangngaia biak pawh an tum chu biak theih lohin an awm nghal a. Thlawhna tlakna hmun nia rinah te hian thlawhna zawn hna ngawrh takin kalpui nghal a ni.

<><><>